



SLUŽBENI GLASNIK

OPĆINE ZAVIDOVIĆI

Broj: 11 , Datum: 15.11.2007.

I – AKTI OPĆINSKOG VIJEĆA

Na osnovu člana 12. Zakona o javnom redu i miru («Službene novine ZE-DO kantona» broj 8/00 i 11/2007), člana 8. stav 3. alineja 16. Zakona o principima lokalne samouprave u Federaciji Bosne i Hercegovine («Službene novine FBiH» broj 49/06) i člana 55. Statuta Općine Zavidovići («Službeni glasnik Općine Zavidovići», broj 11/2004, 8/2005 i 2/2006) Općinsko vijeće Zavidovići na 42.sjednici, održanoj 14.11.2007. godine donijelo je

ODLUKU**o javnom redu i miru****I-OPĆE ODREDBE****Član 1.**

Ovom Odlukom reguliše se javni red i mir na cijelom području općine Zavidovići, te se utvrđuje koje radnje, postupci i ponašanja predstavljaju narušavanje javnog reda i mira, a kojim se remeti normalan način života građana, narušava i ugrožava njihova sigurnost, ometa rad državnih organa i pravnih lica, narušava javni moral, izuzev prekršaja javnog reda i mira propisanih Zakonom, te propisuju prekršajne sankcije.

Pod javnim mjestom u smislu ove Odluke podrazumijeva se mjesto na kojem je slobodan pristup pojedinačno neodređenim licima bez uvjeta ili pod određenim uvjetima.

II- POSEBNE ODREDBE O ZAŠTITI JAVNOG REDA I MIRA**Član 2.**

Na javnim mjestima gdje se stvaraju redovi građana, kao što su šalteri, javne blagajne, sredstva javnog prevoza i slično, zabranjeno je stvaranje nereda izazvano guranjem i ulaženjem preko reda.

Građani su dužni da se na mjestima iz prethodnog stava i sličnim mjestima, svrstavaju u redove po redu dolaska, osim invalidnih lica, trudnica i roditelja sa djecom do 5 godina starosti, kojim se daje prednost pri kupovini ulaznica i ulaska u objekte.

Član 3.

U naselju, na otvorenom prostoru, zabranjeno je upotrebljavati aparate - muzičke instrumente sa pojačanjem zvuka.

Izuzetno, Služba za upravu društvenih djelatnosti i opću upravu može dati odobrenje za izvođenje muzike uživo, uz korištenje sredstava za pojačanje zvuka na lokacijama iz prethodnog stava organizatorima kulturnih i drugih manifestacija od šireg značaja (kulturne, sportske i slične manifestacije, predizborni skupovi i sl.).

Odobrenje iz prethodnog stava izdaje se na određeno vrijeme, sa tačnom oznakom vremenskog perioda u kojem će se izvoditi muzika uz upotrebu sredstava za pojačanje zvuka.

Ukoliko nadležni organ policije utvrdi da se muzika iz stava 2. ovog člana izvodi mimo vremena određenog u odobrenju, ili da je mir građana narušen, izriče na licu mjesta mjeru zabrane izvođenja muzike.

- 561 -

Član 4.

Izvođenje muzike i upotreba uređaja za reprodukciju muzike u ugostiteljskim objektima ne smije proizvoditi buku koja će jedan metar od izvora buke prelaziti nivo od 50 dB, ako su smješteni u poslovno-stambenim objektima i u ostalim objektima.

Izuzetno, u diskotekama, nivo buke od korištenja akustičnih uređaja ne smije preći nivo od 90 dB.

Član 5.

Zabranjeno je izvoditi i organizovati izvođenje muzike uživo i upotrebljavati uređaje za reprodukciju muzike u ugostiteljskim objektima kako slijedi:

a) u zatvorenom prostoru u ugostiteljskim objektima koji se nalaze u poslovnim i stambeno-poslovnim zgradama od 22,00 do 6,00 sati u zimskom periodu, odnosno od 23,00 do 6,00 sati u ljetnom periodu,

b) u ugostiteljskim objektima iz grupe «barovi» od 02,00 do 06,00 sati.

Zabranjeno je u okviru ljetne bašte kao i na fasadnim zidovima koji vežu uz prostor ljetne bašte, kako sa vanjske tako i sa unutrašnje strane, postavljanje uređaja za puštanje, reprodukciju i pojačavanje zvuka.

Član 6.

Na javnim mjestima zabranjeno je pjevanje, vikanje, igranje kola, plesanje, sviranje i galama u vremenu od 16,00 do 18,00 sati i od 22,00 do 6,00 sati narednog dana.

Zabranjeno je stvaranje buke pojačanim radom motornog vozila, upotrebom sirena, utovarom ili istovarom roba ili smeća, sječenjem drva ili drugih drvenih ili metalnih predmeta i upotreba alata koji prilikom rada stvaraju buku, u vremenu od 16,00 do 18,00 sati i od 22,00 do 6,00 sati.

Član 7.

Uslužni i privredni objekti su dužni da se pridržavaju radnog vremena utvrđenog njihovim aktima, a na ulazu u objekat mora stajati natpis sa radnim vremenom.

Zabranjen je rad:

a) Klasičnih prodavnica, samoposluga, diskontnih prodavnica, butika, robnih kuća, kioska, prodajnih stolova, pokretnih prodavnica, automata, skladišta-stovarišta, administrativnih prostora trgovina na osnovu uzorka i u tranzitu, tržnica na veliko, tržnica na malo, trgovinskih centara, stočnih pijaca, sajмова i vašara, stočnih sajмова, otkupnih stanica poljoprivrednih proizvoda i stoke i ostalih trgovačkih objekata u smislu Zakona o trgovini, osim dragstora i benzinskih pumpnih stanica, u vremenu od 20,00 do 6,00 u zimskom periodu i od 22,00 do 6,00 sati u ljetnom periodu.

b) Ugostiteljskih objekata, odnosno radnji, osim grupe barovi, hoteli, moteli i diskoteke definirane podzakonskim aktom o razvrstavanju ugostiteljskih objekata, u vremenu od 24,00 do 6,00 sati.

c) Radnji-pekarara, u vremenu od 24,00 do 6,00 sati (u smislu prodaje).

d) Svih trgovačkih i obrtničkih objekata prvi dan državnog praznika, osim apoteka, namjenskih prodavnica pekarskih proizvoda, ugostiteljskih objekata i kioska namijenjenih za prodaju dnevne štampe.

Član 8.

Na javnim i vjerskim skupovima, svadbama, u ugostiteljskim objektima zabranjeno je nošenje predmeta kojim se može nanijeti tjelesna povreda, odnosno koji su očito namijenjeni za tuču.

Zabranjeno je nošenje i upotreba predmeta i naprava u vidu prački, svih sredstava za ličnu zaštitu (sprej) ili sličnih sredstava kojim se ugrožava bezbjednost drugih lica i imovine.

- 562 -

Na javnom mjestu zabranjena je prodaja i bacanje petardi i drugih pirotehničkih sredstava čijom se upotrebom izaziva uznemirenost građana.

Zabranjeno je na javnom mjestu bacanje i lomljenje boca i sličnih predmeta pogodnih da povrijede drugu osobu.

Član 9.

Na prolaznike i automobile zabranjeno je bacanje leda i snijega (grudve), kamenja ili drugih predmeta kao i bacanje predmeta iz zgrada ili ograđenih prostora ili prosipanje tekućina i slično.

Zabranjeno je prskanje prolaznika vodom prilikom pranja ulica, pločnika, dvorišta i balkona, zalijevanja vrtova i travnjaka te prljavštinom ispod točkova vozila u pokretu.

Član 10.

Zabranjeno je:

- a) puštanje i vođenje psa na javnom mjestu bez zaštitne korpice na njušci i povodca;
- b) uvođenje životinja u ugostiteljske i slične objekte;
- c) držanje opasne životinje na način kojim se može ugroziti život i zdravlje građana i neisticanje upozorenja na opasnost od takvih životinja na ulazu i zatvorenom dvorištu ili drugom određenom prostoru gdje su smještene;
- d) držanje životinja koje remete noćni mir građana u naseljenom mjestu;
- e) surovo postupanje sa životinjama na javnom mjestu, podstrekavanje na borbu i izazivanje životinja.

Član 11.

Zabranjeno je ulaženje u prostorije i u ograđene prostore preduzeća i javnih ustanova i drugih ustanova na mjestima koja nisu određena za ulaz, kao i izlaženje van mjesta određenih za izlaz. Za ovaj prekršaj kazniti će se i lice koje neovlašteno ulazi u ograđen prostor, prostorije privrednih društava i poslovne prostorije (trgovačke, ugostiteljske, obrtničke i slične prostorije) suprotno pravilima njihovog unutrašnjeg reda.

Član 12.

Zabranjeno je unošenje alkoholnih pića od strane posjetilaca u stacionirane ustanove i sportske objekte za vrijeme održavanja sportskih i kulturnih manifestacija, a naročito se zabranjuje konzumiranje alkoholnih pića ispred prodavnica i kioska, kao i prodaja alkoholnih pića od strane organizatora.

Zabranjeno je točenje alkoholnih pića u ugostiteljskim objektima ili vršenje prodaje alkohola u trgovačkim radnjama licima mlađim od 18 godina.

Zabranjeno je konzumiranje alkohola izvan ugostiteljskih objekata, na ulici, trgu, u parkovima, na pijaci, autobusnoj i željezničkoj stanici, u prevoznom sredstvu javnog saobraćaja, ispred trgovačkih radnji, spomenika, na ostalim javnim površinama i slično.

Član 13.

Zabranjeno je sjedenje na izlazima iz objekata, pultovima kioska, trotoarima, ivičnjacima, mostovima, ogradama, i drugim mjestima na kojim bi se takvom radnjom ometalo kretanje pješaka.

Zabranjeno je ležanje i spavanje na ulici, putu, klupama u parkovima, čekaonicama, autobusnim stajalištima, pod mostovima i sličnim mjestima.

- 563 -

Član 14.

Zabranjeno je pisanje, crtanje grafita i lijepljenje plakata na fasadama zgrada izvan dozvoljenih mjesta.

Zabranjeno je oštećivanje poslovnih, stambenih ili drugih objekata.

Član 15.

Zabranjeno je na riječnim plažama i bazenima kupanje bez odjeće, vršenje bludnih radnji na javnom mjestu te vršenje nužde na mjestima koja za to nisu predviđena.

Član 16.

Zabranjeno je čupanje ili otuđivanje sadnica i drugog rastinja sa javnih površina, te igranje nogometa, košarke, tenisa i druge sportske aktivnosti na ulicama, trgovima, parkovima, zelenim i drugim javnim površinama, koje nisu namijenjene za tu svrhu.

Član 17.

Zabranjeno je pranje motornih vozila i čilima na mjestima gdje to nije dozvoljeno, te prosipanje motornih ulja i ostalih nečistoća.

Član 18.

Zabranjeno je uznemiravanje građana upotrebom zvona, kucanjem ili udaranjem na vrata stana bez potrebe, te radi prodaje robe ili pružanja usluga koje nisu ugovorene ili naručene.

Član 19.

Zabranjeno je zatrpavanje kanala za odvodnju površinskih voda, neovlašteno uklanjanje zaštite za vodovodnu instalaciju i kanalizaciju (šahte);

Zabranjeno je pomjeranje kontejnera za smeće, klupa po parkovima i šetalištima sa mjesta na kojim su postavljena, te paljenje vatre u i oko kontejnera i oštećivanje kontejnera.

III-NADZOR**Član 20.**

Nadzor nad sprovođenjem odredaba članova 2., 3., 5., 6., 8., 9., 10., 11., 12. stav 1, 13., 14. stav 2, 15., 16. i 18. ove Odluke vrši Policijska uprava Zavidovići.

Nadzor nad sprovođenjem odredbe člana 4., 7. i 12. stav 2 ove Odluke vrši tržišna, turističko-ugostiteljska inspekcija.

Nadzor nad sprovođenjem odredaba članova 12. stav 3, 14. stav 1, 16., 17. i 19. ove Odluke vrši komunalna inspekcija.

IV-KAZNENE ODREDBE**Član 21.**

Novčanom kaznom od 500,00 do 2.000,00 KM kazniti će se pravno lice za prekršaj:

1. ako u naselju ili otvorenom prostoru bez prethodnog odobrenja ili mimo odobrenja upotrebljava aparate - muzičke instrumente sa pojačanjem zvuka (član 3. stav 1 i 4),
2. ako izvođenje muzike i upotreba uređaja za reprodukciju zvuka prelazi nivo buke utvrđen u članu 4. ove Odluke,
3. ako izvodi i organizuje izvođenje muzike suprotno zabrani iz člana 5. ove Odluke,
4. ako stvara buku protivno članu 6. stav 2 ove Odluke,
5. ako se ne pridržava radnog vremena iz člana 7. ove Odluke.

- 564 -

6. ako toči alkohol u ugostiteljskim objektima ili vrši prodaju alkohola licima mlađim od 18 godina (član 12. stav 2),

Novčanom kaznom od 50,00 do 500,00 KM kazniti će se odgovorno lice za prekršaj iz stava 1. ovog člana.

Novčanom kaznom u iznosu od 200,00 KM do 700,00 KM kazniti će se i obrtnik, trgovac ili ugostitelj-fizičko lice za prekršaje utvrđene u stavu 1. ovog člana.

Član 22.

Novčanom kaznom od 50,00 do 300,00 KM kazniti će se fizičko lice za prekršaj:

1. ako na javnim mjestima gdje se stvaraju redovi građana stvara nered i ulazi preko reda (član 2.),

2. ako u naselju ili otvorenom prostoru bez prethodnog odobrenja ili mimo odobrenja upotrebljava aparate-muzičke instrumente sa pojačanjem zvuka (član 3. stav 1 i 4),

3. ako se na javnim mjestima ne pridržava zabrane iz člana 6. stav 1 ove Odluke,

4. ako stvara buku protivno članu 6. ove Odluke,

5. ako nosi i baca predmete iz člana 8. ove Odluke,

6. ako postupi suprotno zabrani iz člana 9. ove Odluke,

7. ako postupa sa psom i opasnim životinjama u suprotnosti sa članom 10. ove Odluke,

8. ako ulazi u prostorije i ograđene prostore iz člana 11. ove Odluke,

9. ako unosi i konzumira alkohol suprotno zabrani iz člana 12. stav 1 i 3 Odluke,

10. ako sjedi na objektima 13. stav 1. Odluke i leži na mjestima iz stav 2. istog člana,

11. ako ne poštuje zabrane iz člana 14. do 19. Odluke.

Član 23.

Za prekršaje javnog reda i mira propisane ovom odlukom kazniti će se roditelj, usvojilac, staratelj odnosno zakonski zastupnik ako je izvršenje prekršaja posljedica njihovog propuštanja dužnog staranja o maloljetniku, a u mogućnosti su vršiti takav nadzor.

Član 24.

Kada službenici policije u vršenju službenih poslova i zadataka saznaju za prekršaj propisan ovom odlukom, mogu privremeno oduzeti predmete koji su upotrebljeni ili su bili namijenjeni za izvršavanje prekršaja, kao i predmete koji mogu poslužiti kao dokaz u prekršajnom postupku.

Član 25.

Ova Odluka stupa na snagu prvog dana od dana objavljivanja u «Službenom glasniku Općine Zavidovići».

Član 26.

Stupanjem na snagu ove Odluke prestaje da važi Odluka o javnom redu i miru («Službeni glasnik Općine Zavidovići», broj 2/2000) i Odluka o radnom vremenu u određenim djelatnostima na području općine Zavidovići («Službeni glasnik Općine Zavidovići», broj 6/2002).

OPĆINA ZAVIDOVIĆI
- OPĆINSKO VIJEĆE -

PREDSJEDAVAJUĆI
OPĆINSKOG VIJEĆA

Broj: 01-23-1258/07
Datum, 14.11.2007.godine

(M.P.)

Besim Avdić, prof., s.r.

- 565 -

Na osnovu člana 114. stav 2. Zakona o organizaciji organa uprave u Federaciji Bosne i Hercegovine («Službene novine Federacije BiH», broj 35/05) i člana 55. Statuta općine Zavidovići («Službeni glasnik općine Zavidovići», broj 11/04-prečišćeni tekst, 8/05 i 2/06), Općinsko vijeće Zavidovići na 42.sjednici održanoj 14.11.2007.godine, donijelo je

ODLUKU

o visini novčanih sredstava koja će se obezbijediti Rebalansom Budžeta Općine Zavidovići za 2007.godinu za kupovinu putničkog motornog vozila

I

Općinsko vijeće određuje visinu novčanih sredstava koja će se obezbijediti Rebalansom Budžeta Općine Zavidovići za 2007.godinu za kupovinu putničkog motornog vozila.

II

Visina novčanih sredstava koja će se obezbijediti Rebalansom Budžeta Općine Zavidovići za 2007.godinu određuje se u iznosu od 40.000,00 KM.

III

Sastavni dio ove odluke je Odluka Općinskog načelnika o prodaji i kupovini motornog vozila broj 02-14-5957/07 od 01.11.2007.godine.

IV

Odluka stupa na snagu prvog narednog dana od dana objavljivanja u «Službenom glasniku Općine Zavidovići».

OPĆINA ZAVIDOVIĆI
- OPĆINSKO VIJEĆE -

Broj: 01-14-5957/07
Datum, 14.11.2007.godine

PREDSJEDAVAJUĆI
OPĆINSKOG VIJEĆA

Besim Avdić, prof., s.r.

(M.P.)

- 566 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKI NAČELNIK

Broj: 02-14-5957/07

Datum, 01.11.2007.godine

Na osnovu člana 114. stav 2. Zakona o organizaciji organa uprave u Federaciji Bosne i Hercegovine («Službene novine Federacije BiH», broj 35/05) i člana 122. Statuta općine Zavidovići («Službeni glasnik općine Zavidovići», broj 11/04-prečišćeni tekst, 8/05 i 2/06), Općinski načelnik Zavidovići, donio je

ODLUKU

o prodaji i kupovini motornog vozila

I

Prodaje se motorno vozilo u vlasništvu Općine Zavidovići – Općinski načelnik Marke FIAT, tip vozila «MAREA», boje siva metalik, broj šasije ZFA 18500000424688, broj motora 2570349, model vozila 20 X HLX, godina proizvodnje 2001.godine, snage motora 110, radni obujam motora 1998, registarske oznake 351-E-691.

II

Općinski načelnik će utvrditi vrijednost motornog vozila iz tačke I ove odluke u posebnom postupku i nakon toga prodati motorno vozilo putem prikupljanja pismenih ponuda.

III

Novčana sredstva dobijena prodajom motornog vozila iz tačke I ove odluke, bit će prihod Budžeta općine Zavidovići za 2007.godinu na stavci «Ostali prihodi od prodaje imovine, vrsta prihoda 721231».

IV

Nabavit će se putničko vozilo slijedećih karakteristika: 2.0E, vrsta vozila: putničko, zapremina motora: 1997 ccm, snaga motora: 103 KW/140 KS, broj vrata: 4, broj putničkih mjesta: 5, sa dodatnom opremom.

V

Za realizaciju ove odluke zadužuje se Služba za upravu društvenih djelatnosti i opću upravu i Služba za upravu ekonomskih poslova i poduzetništvo.

VI

Ova odluka stupa na snagu danom donošenja i bit će objavljena u «Službenom glasniku općine Zavidovići».

OPĆINSKI NAČELNIK

(M.P.)

Izet Bašić, dipl.ing.agr., s.r.

- 567 -

Na osnovu člana 2.12.stav 5. Izbornog zakona Bosne i Hercegovine («Službeni glasnik BiH», broj 23/01; 7/02; 9/02; 20/02; 25/02 i 20/04, 25/05,52/05, 5/05,77/05,11/06 24/06 i 32/07), Odluke Centralne Izborne Komisije Bosne i Hercegovine broj 01-07-1-318/06 od 24.04.2007. godine i člana 55. Statuta općine Zavidovići («Službeni glasnik općine Zavidovići», broj 11/04-prečišćeni tekst, 8/05 i 2/06), Općinsko vijeće Zavidovići na 42. sjednici od 14.11.2007. godine, donijelo je

RJEŠENJE

o imenovanju člana Općinske izborne komisije

I

U Općinsku izbornu komisiju imenuju se:

MUHIĆ ŠEMSUDIN, diplomirani pravnik - član

II

Mandat člana komisije iz tačke I predmetnog rješenja traje pet godina, od dana dobijanja saglasnosti od Centralne izborne komisije BiH.

III

Predmetnim Rješenjem stavlja se van snage tačka II stav 1. alineja 2. Rješenja o imenovanju članova Općinske izborne komisije broj: 01-05-1001/07 od 10.07.2007.godine («Službeni glasnik općine Zavidovići», broj 7/2007).

IV

Rješenje stupa na snagu po dobijanju saglasnosti od Centralne izborne komisije BiH.

V

Rješenje objaviti u «Službenom glasniku općine Zavidovići».

OPĆINA ZAVIDOVIĆI
- OPĆINSKO VIJEĆE -

Broj: 01-05-1001/07
Datum, 14.11.2007.godine

PREDSJEDAVAJUĆI
OPĆINSKOG VIJEĆA

Avdić Besim, prof., s.r.

(M.P.)

BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-05-5647/07

Dana, 14.11.2007.godine

Na osnovu člana 10. Odluke o legalizaciji bespravno izgrađenih građevina («Službene novine Zeničko-dobojskog kantona», broj 15/07) i člana 55. Statuta općine Zavidovići («Službeni glasnik općine Zavidovići», broj 11/04, 8/05 i 2/06), Općinsko vijeće Zavidovići je na 42.sjednici održanoj 14.11.2007.godine, donijelo

RJEŠENJE

o imenovanju Stručne komisije o davanju stručne ocjene u postupku legalizacije bespravno izgrađenih građevina

I

Imenuje se Stručna komisija (u daljem tekstu: Stručna komisija) o davanju stručne ocjene u postupku legalizacije bespravno izgrađenih građevina u sastavu:

1. Sinanović Remzo, diplomirani pravnik - predsjednik
2. Dedić Mirsad, dip.ing.arh. - zamjenik predsjednika
3. Miličević Džeraldina, dipl.ing.građ. - član
4. Husejinović Nihada, dipl.pravnik - član
5. Šogolj Remzo, dipl.ing.geodezije - član

II

Zadatak Stručne komisije iz prethodne tačke je davanje stručne ocjene u postupku legalizacije bespravno izgrađenih građevina.

III

Stručna komisija za svoj rad ima pravo na naknadu koja će se utvrditi posebnim aktom Općinskog načelnika, a troškove rada komisije snosi lice po čijem zahtjevu Stručna komisija radi.

IV

Stručne poslove za potrebe ove Komisije obavljat će Služba za upravu geodetskih, imovinsko-pravnih poslova i urbanizma.

V

Ovo rješenje stupa na snagu danom donošenja a objavit će se u «Službenom glasniku Općine Zavidovići».

O b r a z l o Ź e n j e

Pravni osnov ovog rješenja je član 10. Odluke o legalizaciji bespravno izgrađenih građevina («Službene novine Ze-do kantona», broj 15/07), (u daljem tekstu Odluke) koji glasi: «Stručnu komisiju od 5 članova imenuje Skupština Zeničko-dobojskog kantona, na prijedlog ministra Ministarstva za prostorno uređenje, promet i komunikacije i zaštitu okoline, odnosno Općinsko vijeće na prijedlog općinskog načelnika, zavisno od nadležnosti iz člana 46. Zakona o prostornom uređenju.

U Stručnu komisiju iz stava 1. ovog člana imenuju se: pomoćnik ministra, odnosno šef službe za prostorno uređenje koji predsjedava Stručnom komisijom, jedan diplomirani inženjer arhitekture, jedan inženjer građevine, jedan diplomirani inženjer čija će se struka odrediti zavisno od vrste, veličine i namjene građevine i jedan diplomirani pravnik.

Članovi Stručne komisije moraju imati najmanje pet godina radnog iskustva na poslovima prostornog planiranja i provođenja prostorno-planske dokumentacije i položen stručni ispit.

Stručna komisija za svoj rad ima pravo na naknadu koja će se utvrđivati posebnim aktom ministra, odnosno načelnika, a troškove rada komisije snosi lice po čijem zahtjevu Stručna komisija radi».

U skladu sa prethodno citiranim članom Odluke Općinsko vijeće je obavezno da imenuje Stručnu komisiju čiji je zadatak donošenje stručne ocjene u postupku legalizacije bespravno izgrađenih objekata, a što je propisano članom 9. Odluke koji glasi: «Za slučajeve bespravno izgrađene građevine koja se nalazi na prostoru za koji nije donesen odgovarajući prostorno-planski akt, ako se bespravno izgrađeni objekat po svojoj namjeni, izgledu i položaju uklapa u okruženje na području na kojem se nalazi, kao i ako zadovoljava propisane građevinske standarde i uslove predviđene posebnim zakonima, donijet će se rješenje na osnovu ocjene Stručne komisije (u daljem tekstu: Stručna komisija)».

U skladu sa citiranim članom 10. Odluke Stručnu komisiju obavezno čine Šef službe za prostorno uređenje koji je ujedno i predsjednik Komisije, te po jedan diplomirani inženjer arhitekture i građevine i diplomirani pravnik a peti član Komisije je diplomirani inženjer čija će se struka određivati zavisno od vrste, veličine i namjene građevine.

U skladu sa navedenim odlučeno je kao u dispozitivu rješenja.

**PREDSJEDAVAJUĆI
OPĆINSKOG VIJEĆA**

(M.P.)

Besim Avdić, prof., s.r.

- 570 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-14-5560/07

Datum, 14.11.2007.godine

Na osnovu člana 93., a u vezi sa članom 101. Poslovnika Općinskog vijeća Zavidovići («Službeni glasnik općine Zavidovići», broj 11/2004, 8/2005 i 2/06), Općinsko vijeće Zavidovići na 42. sjednici od 14.11.2007.godine, razmatralo je Informaciju o realizaciji Zaključka Općinskog vijeća Zavidovići broj 01-34-1292/07 od 03.05.2007.godine sa Programom obuhvata djece predškolske dobi predškolskim odgojem i obrazovanjem u predškolsku ustanovu, pa nakon rasprave donijelo

ZAKLJUČAK

1. Općinsko vijeće Zavidovići usvaja Informaciju o realizaciji Zaključka Općinskog vijeća Zavidovići broj 01-34-1292/07 od 03.05.2007.godine sa Programom obuhvata djece predškolske dobi predškolskim odgojem i obrazovanjem u predškolskoj ustanovi.

2. Za realizaciju Programa obuhvata djece predškolske dobi predškolskim odgojem i obrazovanjem u predškolskoj ustanovi zadužuje se Općinski načelnik, Služba za upravu društvenih djelatnosti i opću upravu i Javna ustanova «Gradski dječiji vrtić» Zavidovići.

3. Zaključak stupa na snagu odmah.

PREDSJEDAVAJUĆI
OPĆINSKOG VIJEĆA

(M.P.)

Besim Avdić, prof., s.r.

**JU «GRADSKI DJEČIJI VRTIĆ»
Z A V I D O V I Ć I****P R O G R A M****OBUHVATA DJECE PREDŠKOLSKE DOBI PREDŠKOLSKIM ODGOJEM I
OBRAZOVANJEM U PREDŠKOLSKOJ USTANOVU****UVOD**

Naziv programa. «Uključivanje djece predškolske dobi iz socijalno-ugroženih kategorija u predškolsku ustanovu»

Predlagač programa: JU «Gradski dječiji vrtić»

Sjedište Ustanove: Prvomajska b.b. Zavidovići

Osnivač Ustanove: Općinsko vijeće Zavidovići

Djelatnost Ustanove: Odgoj, obrazovanje, smještaj, ishrana i njega djece od jedne godine života do polaska u školu

Resorno Ministarstvo: Ministarstvo za obrazovanje, nauku, kulturu i sport
ZE-DO kantona

Obrazovni nivo: Predškolski odgoj i obrazovanje

Razlozi za pokretanje Programa

Gradski dječiji vrtić je javna ustanova čija je osnovna djelatnost odgoj, obrazovanje, smještaj, ishrana i njega djece od jedne godine starosti do polaska u osnovnu školu. Predškolski odgoj je integralni dio jedinstvenog odgojno-obrazovnog sistema na koji se programski nadovezuje osnovni odgoj i obrazovanje. Iz toga proizilazi funkcija predškolstva, a sastoji se u tome da kod djece podstiče sve aspekte razvoja u skladu sa njihovim uzrastom i individualnim mogućnostima.

U ovom periodu potrebe su da predškolski odgoj i obrazovanje se transformiše u skladu sa reformama u sistemu obrazovanja. Predškolska ustanova treba da stekne uslove da obezbjedi podjednake uslove za njegu, psiho-fizički razvoj i odgoj za svu djecu predškolskog uzrasta i jedinstvo odgojnih uticaja na dijete u relaciji predškolska ustanova-porodica-društvena sredina. Porodična sredina je osnovna društvena sredina djeteta koja daje osnovu pripremanja djeteta za život. Tu dijete stiče prve i osnovne predstave o koegzistenciji. Porodica je osnovna ćelija društva pruža djetetu materijalnu, emotivnu i moralnu sigurnost.

Opći uslovi u kojima djeca žive, odgajaju se i obrazuju nisu zadovoljavajući sa stanovišta njihovog razvoja i odgoja zbog velikog broja djece koja žive u nepovoljnim materijalnim uslovima i u neimaštini te u skućenim stambenim prostorima i naseljima bez adekvatnog prostora za igru.

Polazeći od postojeće socijalno-ekonomske situacije u našem gradu velike nezaposlenosti neophodno je omogućiti djeci iz porodica socijalno ugroženih kategorija da budu buhvaćena predškolskim odgojem i pomoći roditeljima iz razloga:

- Svako dijete ima pravo na obrazovanje s ciljem razvoja dječije ličnosti, talenta, mentalnih-fizičkih sposobnosti, te poštivanje dječijih i ljudskih prava, a u cilju zadovoljavanja potreba djece i porodice što je obaveza društva;
- Predškolski odgoj čini organizovanu brigu, njegu, zaštitu, odgoj i obrazovanje i ima neposredan efekat na ukupan razvoj djeteta i pojedinih dimenzija njegove ličnosti i da produ stručno organizovanu pripremu za školu jer je činjenica da djeca koja su bila obuhvaćena predškolskim odgojem i obrazovanjem imaju više samopouzdanja, stabilnija su i imaju mogućnost za rješavanje poteškoća. U skladu sa Zaključkom Općinskog vijeća broj 01-43-1292/07 od 03.05.2007. godine obuhvatiti djecu iz socijalno-ugroženih porodica u predškolsku ustanovu.

Cilj programa: Zbog potreba i interesovanja predškolskoj djeci iz socijalno-ugroženih kategorija osigurati uslove za tjelesni, intelektualni, emocionalni, socijalni razvoj i uspješan dalji odgoj i obrazovanje a u skladu sa naučnim dostignućima

Posebni ciljevi: Uključivanje djece iz porodica socijalno-ugroženih kategorija u predškolsku ustanovu sa ciljem da sva djeca steknu ista prava za ujednačavanje nivoa predznanja kao preduslov za obavezno školovanje jer ne adekvatno ulaganje u rani rast i razvoj djeteta je nenadoknativ gubitak za budućnost

Potrebe Programa: Nauka dokazuje da dječiji rast i razvoj počinje u utrobi majke, a u predškolskoj dobi djeteta se razvijaju i formiraju osnovi rasta i razvoja u svim aspektima. Dosadašnja praksa u našem društvu pokazuje da se dijete uključuje u organizovani rad odnosno sistem tek u šestoj godini života kada su već formirane osnove razvoja ličnosti. Imajući činjenicu da mnoge porodice u našem gradu nemaju sredstava za uključivanje djece u predškolsku ustanovu stvaraju se preduslovi za obuhvat djece iz porodica socijalno-ugroženih kategorija a u duhu Zaključka Općinskog vijeća a u cilju obuhvata većeg broja djece u predškolsku ustanovu, a imajući u vidu socijalno-ekonomsku situaciju tih porodica ovim Programom se stvaraju uslovi za prihvatanje djece u predškolsku ustanovu na stručno organizovan rad Program obuhvata djece iz socijalno-ugroženih porodica se planira realizovati u narednoj školskoj godini i sa obuhvatom 30-toro djece. Djeca će koristiti usluge Ustanove u dnevnom trajanju od 8 sati i biće smještene u odgojnim grupama što će detaljno biti razrađeno Godišnjim programom rada Ustanove.

Aktivnosti: U cilju obuhvata djece iz porodica socijalno-ugroženih kategorija predškolskim odgojem i obrazovanjem u predškolsku ustanovu a u skladu sa Zaključkom Općinskog vijeća realizovane su:

- Sa udruženjima RVI-a, JOB-a, PB i Š-A, Roma, Zavodom za zapošljavanje i Centrom za socijalni rad obavljen je razgovor i uspostavljena komunikacija sa Zaključkom Općinskog vijeća o obuhvatu djece predškolskog uzrasta predškolskim odgojem i obrazovanjem iz socijalno-ugroženih kategorija u cilju pomoći roditeljima u njezi, zaštiti odgoju i psihološkoj pripremi za školu uz pomoć i razumjevanje Općinskog vijeća gore navedene institucije su upoznate sa značajem i potrebom djece predškolskim odgojem

- dopis sa anketnim listićima ustanova je dostavila svim Udruženjima i navedenim subjektima koji su dostavili svojim članovima, koji imaju djecu predškolskog uzrasta radi iskazivanja potreba i interesovanja za smještaj djece u predškolsku ustanovu uz veliko interesovanje podršku i zahvalnost popunjeni anketni listići su podneseni predškolskoj ustanovi osim razgovora ovom inicijativom građanstvo je upoznato i putem sredstava javnog informisanja. Sve aktivnosti su se realizovale u koordinaciji sa Službom za upravu društvenih djelatnosti i opću upravu i vršene konsultacije za sve aktivnosti po Planu obuhvata djece socijalno-ugroženih kategorija .

Očekivani rezultati:

Obuhvat djece predškolske dobi iz kategorija socijalno-ugroženih porodica predškolskim odgojem i obrazovanjem u organizovan rad pod stručnim nadzorom;
Zaštita djece i stvaranje uslova za realizaciju dječijih prava;
Pružanje pomoći porodicama iz socijalno-ugroženih kategorija;
Primjena mjera na temelju stručno naučnih spoznaja, mogućnosti i potreba radi ostvarivanja ciljeva za pripremu djeteta škol uz uvođenje inovacija i rješavanje poteškoća porodica socijalno-ugroženih kategorija.

Program će biti realizovan u školskoj 2007/2008. godini (počev od januara 2008. godine) i u školskoj 2008/2009. godini (zaključno sa 31.08.2009. godine).

POTREBNA FINANSIJSKA SREDSTVA ZA IMPLEMENTACIJU PROGRAMA SU:

- bruto plaće radnika (2-odgajatelja)	19.416,60 KM
- prehrambeni artikli (namirnice)	13.980,00 KM
- materijalni troškovi	2.723,40 KM

Za realizaciju Programa a na bazi 33 djece potrebna sredstva od Osnivača su u ukupnom iznosu od 36.120,00 KM godišnje.

Direktor:

Bečić Sabahija, s.r.

Predsjednik Upravnog odbora:

(M.P.)

Almasa Đerzić, prof., s.r.

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-05-5735/07

Datum, 14.11.2007.godine

Na osnovu člana 93. Poslovnika Općinskog vijeća Zavidovići («Službeni glasnik općine Zavidovići», broj 11/2004-prečišćeni tekst, 8/2005 i 2/2006), Općinsko vijeće Zavidovići na 42.sjednici od 14.11.2007. godine, razmatralo je Informaciju o uspjehu i vladanju učenika osnovnih škola na kraju školske 2006/2007.godine i Informaciju o uspjehu i vladanju učenika srednjih škola na kraju školske 2006/2007.godine, pa nakon rasprave donijelo

ZAKLJUČAK

I

Općinsko vijeće Zavidovići usvaja Informaciju o uspjehu i vladanju učenika osnovnih škola na kraju školske 2006/2007.godine i Informaciju o uspjehu i vladanju učenika srednjih škola na kraju školske 2006/2007.godine sa predloženim zaključcima:

1. Godišnje planove i programe u školskoj 2006/07 godini sve škole su realizovale u potpunosti;
2. Obaveza svih škola je da aktivno učestvuju u procesu reforme odgojno-obrazovnog sistema;
3. Kod nastavnika primjenjivati cjeloživotno učenje (seminari, okrugli stolovi itd.);
4. Primjenjivati interaktivnu nastavu i savremene metode uz maksimalno korištenje postojećih kapaciteta (učila, opreme i prostora);
5. Unaprijediti i osavremeniti rad slobodnih aktivnosti uz finansijsko praćenje potreba za ovu vrstu poslova;
6. Posebnu pažnju posvetiti saradnji i uključivanju roditelja u sve oblike rada i aktivnosti u školi;
7. Posvetiti dužnu pažnju učenicima sa posebnim potrebama i psihofizičkim teškoćama;
8. Voditi brigu o nadarenim učenicima i omogućiti im da razvijaju tu svoju nadarenost;
9. U cilju obezbjeđivanja i zadržavanja stručnog nastavnog kadra u seoskim sredinama potrebno je stimulirati rad u otežanim uslovima, obezbijediti finansiranje prijevoza nastavnika i adaptaciju, odnosno izgradnju stanova;
10. Usklađivati strategiju razvoja obrazovanja sa reformom i evropskim standardima, te potrebama privrede;
11. Održavati visok stepen radne discipline i odgovornosti prema radnim zadacima, te stalno usmjeravati nastavnike na ujednačavanje kriterija;
12. Škole treba da poduzmu sve mjere kako bi se smanjilo izostajanje učenika sa nastave;
13. U srednjim školama (Srednja tehnička i Srednja stručna škola) razmotriti mogućnost uvođenja novih struka i zanimanja prije početka provođenja aktivnosti na pripremi plana upisa učenika u prvi razred;
14. Razvijati i njegovati demokratske odnose među učenicima.

II

Zaključak stupa na snagu odmah.

PREDSJEDAVAJUĆI
OPĆINSKOG VIJEĆA

(M.P.)

Besim Avdić, prof., s.r.

- 575 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-34-5868/07
Datum, 14.11.2007.godine

Na osnovu člana 93. Poslovnika Općinskog vijeća Zavidovići («Službeni glasnik općine Zavidovići», broj 11/2004-prečišćeni tekst, 8/2005 i 2/2006), Općinsko vijeće Zavidovići na 42.sjednici od 14.11.2007. godine, razmatralo je Izvještaj o radu inspekcijских organa za period juli-avgust 2007.godine, pa nakon rasprave donijelo

ZAKLJUČAK

1. Općinsko vijeće Zavidovići ne prihvata Izvještaj o radu inspekcijских organa za period juli-avgust 2007.godine.
2. Zaključak stupa na snagu odmah.

(M.P.)

PREDSJEDAVAJUĆI
OPĆINSKOG VIJEĆA

Besim Avdić, prof., s.r.

- 576 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-05-5663/07

Datum, 14.11.2007.godine

Na osnovu člana 93. Poslovnika Općinskog vijeća Zavidovići («Službeni glasnik općine Zavidovići», broj 11/2004-prečišćeni tekst, 8/2005 i 2/2006), Općinsko vijeće Zavidovići na 42.sjednici od 14.11.2007. godine, razmatralo je Izvještaj o radu Komisije za utvrđivanje prometne vrijednosti nepokretnosti za period 01.01.2007. – 30.06.2007.godine, pa nakon rasprave donijelo

ZAKLJUČAK

1. Općinsko vijeće Zavidovići usvaja Izvještaj o radu Komisije za utvrđivanje prometne vrijednosti nepokretnosti za period 01.01.2007. – 30.06.2007.godine.
2. Zaključak stupa na snagu odmah.

(M.P.)

**PREDSJEDAVAJUĆI
OPĆINSKOG VIJEĆA**

Besim Avdić, prof., s.r.

- 577 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-31-33/07

Datum, 14.11.2007.godine

Na osnovu člana 93., a u vezi sa članom 101. Poslovnika Općinskog vijeća Zavidovići («Službeni glasnik općine Zavidovići», broj 11/2004, 8/2005 i 2/06), Općinsko vijeće Zavidovići na 42. sjednici od 14.11.2007.godine, razmatralo je Prijedlog rješenja o usvajanju prigovora Porobić Adisa iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine, donijelo je

ZAKLJUČAK

1. Općinsko vijeće Zavidovići ne prihvata Prijedlog rješenja o usvajanju prigovora Porobić Adisa iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine.

2. Zaključak stupa na snagu odmah.

(M.P.)

PREDSJEDAVAJUĆI
OPĆINSKOG VIJEĆA

Besim Avdić, prof., s.r.

- 578 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKO VIJEĆE -

Broj: 01-31-32/07

Datum, 14.11.2007.godine

Na osnovu člana 93., a u vezi sa članom 101. Poslovnika Općinskog vijeća Zavidovići («Službeni glasnik općine Zavidovići», broj 11/2004, 8/2005 i 2/06), Općinsko vijeće Zavidovići na 42. sjednici od 14.11.2007.godine, razmatralo je Prijedlog rješenja o odbijanju prigovora Bjelkić-Terzić Muamere iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine, donijelo je

ZAKLJUČAK

1. Općinsko vijeće Zavidovići ne prihvata Prijedlog rješenja o odbijanju prigovora Bjelkić-Terzić iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine,

2. Zaključak stupa na snagu odmah.

(M.P.)

PREDSJEDAVAJUĆI
OPĆINSKOG VIJEĆA

Besim Avdić, prof., s.r.

II – AKTI OPĆINSKOG NAČELNIKA

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
OPĆINSKI NAČELNIK
Služba za upravu društvenih djelatnosti
i opću upravu

Broj: 04-37-5724/07

Dana, 19.10.2007.godine.

Općinski načelnik Zavidovići – Služba za upravu društvenih djelatnosti i opću upravu na osnovu člana 146. stav 1. Zakona o zdravstvenoj zaštiti («Službene novine FBiH», broj 29/97/ i člana 7. Pravilnika o načinu pregleda umrlih i načinu utvrđivanja vremena i uzroka smrti («Službene novine FBiH», broj 15/00), donosi

RJEŠENJE

o određivanju doktora medicine-mrtvozornika i njihovih zamjenika koji će vršiti pregled umrlih, utvrđivanje uzroka i vremena smrti lica umrlih izvan zdravstvene ustanove po mjesnim područjima na općini Zavidovići

I

Ovim rješenjem određuju se doktori medicine-mrtvoznici i njihovi zamjenici, koji će vršiti pregled umrlih, utvrđivanje uzroka i vremena smrti lica umrlih izvan zdravstvene ustanove po mjesnim područjima na općini Zavidovići.

1. Mjesno područje Zavidovići

(područje grada, Majdan, Alići, Dolina, Dubravica, Skroze, Podkleče, Ridžali, Džebe, Biljačić i Dolac)

- | | |
|---|-----------------------------------|
| - Mrtvozornik - Huremović dr Adin | - specijalista porodične medicine |
| - Zamjenici: Osmić-Mulahalilović Berima | - doktor medicine |
| Humkić-Mustafić Maida | - doktor medicine |
| Obralić Asmira | - doktor medicine |

2. Mjesno područje Gostović

- | | |
|-------------------------------|-----------------------------------|
| - Mrtvozornik - Osmić Vahidin | - doktor medicine |
| - Zamjenici: Avdić Damir | - doktor medicine |
| Bošnjaković Mersiha | - doktor medicine |
| Hodžić dr.Galjina | - specijalista porodične medicine |
| Mujkić Nedžad | - medicinski tehničar |

3. Mjesno područje Pašin Konak-Hajderovići

- Mrtvozornik - Osmić Vahidin - doktor medicine
- Zamjenici: Hadžić Amira - doktor medicine
- Huremović dr. Adin - specijalista porodične medicine
- Osmić-Mulahalilović Berima - doktor medicine
- Omerović Hedija - medicinska sestra

4. Mjesno područje Kovači

- Mrtvozornik - Hodžić dr. Galjina - specijalista porodične medicine
- Zamjenici: Osmić Vahidin - doktor medicine
- Obralić Asmira - doktor medicine
- Bošnjaković Mersiha - doktor medicine
- Grahić Azemina - medicinska sestra

5. Mjesno područje Vozuća

- Mrtvozornik - Đerzić Haris - doktor medicine
- Zamjenici: Hadžić Amira - doktor medicine
- Humkić-Mustafić Maida - doktor medicine
- Avdić Damir - doktor medicine
- Javrić Mirzet - medicinski tehničar

II

Doktori medicine-mrtvozornici i njihovi zamjenici koji će obavljati pregled umrlih, utvrđivanje uzroka i vremena smrti lica umrlih izvan zdravstvene ustanove imaju pravo na naknadu za pregled umrlih lica u skladu sa Zaključkom o utvrđivanju visine naknada za pregled umrlih, utvrđivanje uzroka i vremena smrti osoba umrlih izvan zdravstvene ustanove na području općine Zavidovići.

III

Danom stupanja na snagu ovog rješenja prestaje da važi Rješenje o određivanju doktora medicine-mrtvozornika i njihovih zamjenika koji će vršiti pregled umrlih, utvrđivanje uzroka i vremena smrti lica umrlih izvan zdravstvene ustanove po mjesnim područjima na općini Zavidovići broj 04-37-410/06 od 27.02.2006. godine doneseno od strane Općinskog načelnika Zavidovići – Službe za upravljanje društvenih djelatnosti i opću upravu.

IV

Ovo rješenje stupa na snagu danom donošenja, a naknadno će se objaviti u «Službenom glasniku općine Zavidovići».

POMOĆNIK NAČELNIKA

(M.P.)

Šemsudin Starčević, prof., s.r.

Na osnovu člana 15 Zakona o principima lokalne samouprave u Federaciji Bosne i Hercegovine («Službene novine Federacije Bosne i Hercegovine», broj 49/06) i člana 65. Statuta općine Zavidovići («Službeni glasnik općine Zavidovići», broj 11/04 – Prečišćen tekst i 8/05, 2/06), Općinski načelnik, donosi

P R A V I L N I K

o izmjenama i dopunama Pravilnika o unutrašnjoj organizaciji jedinstvenog Općinskog organa uprave i posebnih službi Općine Zavidovići

Član 1.

U Pravilniku o unutrašnjoj organizaciji jedinstvenog Općinskog organa uprave i posebni službi Općine Zavidovići («Službeni glasnik općine Zavidovići», broj 6/05, 1/06 i 12/06), u članu 17.tačka 1.podtačka 1/1 iza rednog broja 4.dodaje se novi redni broj 5. i upisuje se tekst po kolonama kako slijedi:

- u koloni 2. «Stručni saradnik za investicije, infrastrukturu i saobraćaj»,
- u koloni 3. broj «1»,
- u koloni 4. riječi «VSS/VII»,
- u koloni 5. «Građevinski, Arhitektonski fakultet»,
- u koloni 6. riječi «1 godina»,
- u koloni 7. riječ «obavezan»,
- u koloni 8. riječi «Poznavanje rada na računaru».

Član 2.

U članu 17. tačka 1. podtačka 1/1 pod rednim brojem 6. u koloni 5.briše se riječ «Poljoprivredni»,

Član 3.

U članu 17.tačka 1.podtačka 1/1 redni brojevi «5.,6.,7.,8.,9.,10.,11.,12.,13.,14.,15.i 16.» postaju redni brojevi «6.,7.,8.,9., 10.,11.,12.,13.,14.,15.,16. i 17».

Član 4.

U članu 22. u tački 6. pod rednim brojem 5. u koloni 3. broj «1» zamjenju je se sa brojem «2», u koloni 4. iza riječi «Gimnazija» dodaju se riječi «Ekonomska škola»

Član 5.

U članu 23. stav 1. podtačka 1/1 iza rednog broja «4» dodaje se novi redni broj «5» koji glasi:

«Stručni saradnik za investicije, infrastrukturu i saobraćaj»

Opis poslova

- Učestvuje u realizaciji i praćenju pojedinačnih investicionih projekata,
- Prikuplja, evidentira i obrađuje podatke potrebne za izradu vizije i strategije razvoja općine,
- Učestvuje u izradi pojedinačnih analiza o stanju, problemima i mogućnostima obnove i razvoja i predlaganju mjera za njihovo unapređenje,
- Učestvuje u stručnoj pripremi i obradi zahtjeva za finansiranje projekata od strane viših organa, donatora, banaka i međunarodnih institucija,

- 582 -

- Učestvuje u izradi potrebne dokumentacije za izradu prioriternih projekata i učestvuje u pripremnim poslovima za njihovu realizaciju,
- Učestvuje u pripremi srednjoročnih i godišnjim programima održavanja zaštite, rekonstrukcije i izgradnje lokalne i nekategorisane putne mreže,
- Izrađuje tendersku dokumentaciju iz oblasti infrastrukture i saobraćaja,
- Obavlja i druge poslove u skladu sa zakonom i drugim propisima i po nalogu predpostavljenog

Radno mjesto	Državni službenik
Grupa u poslovima osnovne djelatnosti	Stručno operativni poslovi
Pozicija	Stručni saradnik za investicije, infrastrukturu i saobraćaj
Složenost poslova	Složeni
Stručna sprema	VSS/VII
Vrsta školske spreme	Građevinski, Arhitektonski fakultet
Posebni uslovi	Položen stručni ispit, poznavanje rada na računaru
Radni staž	1 godina
Broj izvršilaca	1 (jedan) izvršilac

Član 5.

U članu 23. stav 1. podtačka 1/1 pod rednim brojem 6. kod opisa poslova alineje deset, jedanaest, dvanaest, trinaest, četrnaest, petnaest, šesnaest i sedamnaest brišu se, a kod vrste školske spreme riječ «Poljoprivredni,» briše se.

Član 6.

U članu 23. stav 1. podtačka 1/1 redni brojevi «5.,6.,7.,8.,9.,10.,11.,12.,13.,14.,15. i 16.» postaju redni brojevi « 6.,7.,8.,9.,10.,11.,12.,13.,14.,15.,16. i 17».

Član 7.

Član 23a., se briše.

Član 8.

U članu 28. tačka 6. u tački 5. kod broja izvršilaca broj «1(jedan)» zamjenjuje se sa brojem «2 (dva)», kod vrste školske spreme iza riječ «upravna» umjesto riječi «ili» stavlja se zarez, a iza riječi «gimnazija» dodaju se riječi « ili ekonomska škola».

BOSNA I HERCEGOVINA
FEDERACIJA BOSNE I HERCEGOVINE
ZENIČKO DOBOJSKI KANTON
OPĆINA ZAVIDOVIĆI
OPĆINSKI NAČELNIK

OPĆINSKI NAČELNIK

Izet Bašić, dipl.ing.agr., s.r.

Broj: 02-34-5836/07
Datum, 24.10.2007.godine

(M.P.)

- 583 -

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA ZAVIDOVIĆI
- OPĆINSKI NAČELNIK -

Broj: 02-23-5995/07

Datum, 31.10.2007.godine

Na osnovu člana 15. stav 1. alineja šesta Zakona o principima lokalne samouprave u Federaciji Bosne i Hercegovine («Službene novine Federacije BiH», broj 49/06) i člana 122. Statuta općine Zavidovići («Službeni glasnik općine Zavidovići», broj 11/04-prečišćeni tekst i broj 8/05 i 2/06), a radi izvršavanja Zakona o ograničenoj upotrebi duhanskih prerađevina («Službene novine Federacije BiH», broj 6/98 i 35/98), Općinski načelnik Zavidovići, donio je 31.10.2007.godine,

N A R E D B U

o upotrebi duhanskih prerađevina u općinskim organima uprave i posebnim službama

I

Naredbom o upotrebi duhanskih prerađevina u općinskim organima uprave i posebnim službama (u daljem tekstu: pušenje), određuje se zabrana pušenja u općinskim organima uprave i posebnim službama u toku radnog vremena i u svim prostorijama Općine, izuzev prostorija određenih za pušenje u smislu člana 3. Zakona o ograničenoj upotrebi duhanskih prerađevina («Službene novine Federacije BiH», broj 6/98 i 35/98).

II

U zgradi općinskih organa uprave i posebnih službi određuje se prostorija za pušenje na drugom spratu, prostorija označena brojem **214**.

III

Zabrana pušenja iz tačke I ove naredbe odnosi se na sve zaposlene u zgradi Općine Zavidovići i na sve posjetioce organima vlasti Općine Zavidovići.

IV

Služba za upravu društvenih djelatnosti i opću upravu obilježiti će kancelariju broj 214. sa tekstom «Prostorija za pušenje».

V

Nepridržavanje ove naredbe od strane državnih službenika i namještenika čini povredu radne discipline i povlači disciplinsku odgovornost.

- 584 -

VI

Nepridržavanje ove naredbe od izabranih zvaničnika povlači odgovornost po Etičkom kodeksu izabranih zvaničnika.

VII

Nepridržavanje ove naredbe za posjetioce organima uprave i posebnim službama i organima vlasti Općine povlači prekršajnu odgovornost propisanu Zakonom o ograničenoj upotrebi duhanskih prerađevina.

VIII

Naredba stupa na snagu danom donošenja, a primjenjivat će se od 01.11.2007.godine.

IX

Naredba će se objaviti u «Službenom glasniku općine Zavidovići».

OPĆINSKI NAČELNIK

(M.P.)

Izet Bašić, dipl.ing.agr., s.r.

III – AKTI SEKRETARA OPĆINSKOG VIJEĆA

Na osnovu člana 107. Poslovnika Općinskog vijeća Zavidovići («Službeni glasnik općine Zavidovići», broj 11/2004, 8/2005 i 2/2006), prilikom sravnjavanja izvornog teksta Rješenja broj 01-31-5062/07 od 08.10.2007.godine o utvrđivanju općeg interesa za izgradnju seoskog vodovoda «Klek-Žižci» za potrebe grupe građana u Mjesnoj zajednici «Kovači» - Podružnica Žižci, kojeg je usvojilo Općinsko vijeće Zavidovići na 40. sjednici od 08.10.2007.godine objavljeno u («Službenom glasniku općine Zavidovići,» broj 10/07 – I Akti Općinskog vijeća), na zahtjev Službe za upravu geodetskih, imovinsko-pravnih poslova i urbanizma, broj 06-31-5191/07 od 16.10.2007. godine, sekretar Općinskog vijeća utvrdio je u Rješenju učinjena greška, pa daje

ISPRAVKU

Rješenja broj 01-31-5062/07 od 08.10.2007.godine o utvrđivanju općeg interesa za izgradnju seoskog vodovoda «Klek-Žižci» za potrebe grupe građana u Mjesnoj zajednici «Kovači» - Podružnica Žižci
(«Službeni glasnik općine Zavidovići», broj 10/2007)

I

U Rješenju broj 01-31-5062/07 od 08.10.2007.godine o utvrđivanju općeg interesa za izgradnju seoskog vodovoda «Klek-Žižci» za potrebe grupe građana u Mjesnoj zajednici «Kovači» - Podružnica Žižci («Službeni glasnik općine Zavidovići», broj 10/2007), ispraviti i to:

- u tački 1. dispozitiva Rješenja alineja 1. koja glasi:

«- k.č.1138 zv. «Podkućnica» kuća-zgrada pov.47 m², upisana u P.L.84 K.O. Krivaja, vl.Kenjčić Drago sin Nike iz Kovača, Podvolujak 7, sa dijelom 1/1» se briše.

- u tački 2. dispozitiva predmetnog rješenja dodati novu alineju koja glasi:

«- k.č.1738 zv. «Ismići» šuma 3.klase, pov.1048922 m², upisana u P.L.47 K.O. Krivaja kao DRSV IP «Krivaja» dd Zavidovići, sa dijelom 1/1».

II

Ostali dio Rješenja ostaje ne izmijenjen.

III

Ispravka čini sastavni dio Rješenja.

IV

Ispravku objaviti u «Službenom glasniku općine Zavidovići».

OPĆINA ZAVIDOVIĆI
- OPĆINSKO VIJEĆE -

SEKRETAR
OPĆINSKOG VIJEĆA

Broj: 01-31-5062/07
Datum, 17.10.2007.godine

(M.P.)

Samira Pinjić, dipl.pravnik, s.r.

S A D R Ź A J

	Strana
<u>I – AKTI OPĆINSKOG VIJEĆA</u>	
1. ODLUKA o javnom redu i miru.....	560
2. ODLUKA o visini novčanih sredstava koja će se obezbijediti Rebalansom Budžeta Općine Zavidovići za 2007. godinu za kupovinu putničkog motornog vozila.....	565
3. ODLUKA o prodaji i kupovini motornog vozila	566
4. RJEŠENJE o imenovanju Šemsudina Muhića za člana Općinske izborne komisije	567
5. RJEŠENJE o imenovanju Stručne komisije o davanju stručne ocjene u postupku legalizacije bespravno izgrađenih građevina... ..	568
6. ZAKLJUČAK OV-a o usvajanju Informacije o realizaciji Zaključka OV-a Zavidovići broj 01-34-1292/07 od 03.05.2007.godine	570
7. PROGRAM obuhvata djece predškolske dobi predškolskim odgojem i obrazovanjem u predškolskoj ustanovi	571
8. ZAKLJUČAK OV-a o usvajanju Informacije o uspjehu i vladanju učenika osnovnih škola na kraju školske 2006/2007 godine i Informacije o uspjehu i vladanju učenika srednjih škola na kraju školske 2006/2007.godine.....	574
9. ZAKLJUČAK OV-a o ne prihvatanju Izvještaja o radu inspeksijskih organa za period juli-avgust 2007.godine	575
10. ZAKLJUČAK OV-a o usvajanju Izvještaja o radu Komisije za utvrđivanje prometne vrijednosti nepokretnosti za period 01.01.2007.-30.06.2007.godine.....	576
11. ZAKLJUČAK OV-a o ne prihvatanju Prijedloga rješenja o usvajanju prigovora Porobić Adisa iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine	577
12. ZAKLJUČAK OV-a o ne prihvatanju Prijedloga rješenja o odbijanju prigovora Bjelkić-Terzić Muamere iz Zavidovića izjavljen protiv Zaključka o rezultatima konkursa broj 06-31-4375/07 od 10.09.2007.godine	578
<u>II – AKTI OPĆINSKOG NAČELNIKA</u>	
1. RJEŠENJE o određivanju doktora medicine-mrtvozornika i njihovih zamjenika koji će vršiti pregled umrlih, utvrđivanje uzroka i vremena smrti lica umrlih izvan zdravstvene ustanove po mjesnim područjima na općini Zavidovići.....	579
2. PRAVILNIK o izmjenama i dopunama Pravilnika o unutrašnjoj organizaciji jedinственog Općinskog organa uprave i posebnih službi Općine Zavidovići	581
3. NAREDBA o upotrebi duhanskih preradevina u općinskim organima uprave i posebnim službama	583
<u>III – AKTI SEKRETARA OPĆINSKOG VIJEĆA</u>	
1. ISPRAVKA Rješenja broj 01-31-5062/07 od 08.10.2007.godine o utvrđivanju općeg interesa za izgradnju seoskog vodovoda «Klek-Žožci» za potrebe grupe građana u Mjesnoj zajednici «Kovači» - Podružnica Žižci («Službeni glasnik općine Zavidovići», broj 10/2007).....	585

